

# LESA WIILUMBULULA

## AYE MWINE



Taata Wetu Wamwiulu, Kyambo kimo kyafuma kwi Anweba kyakonsha kulumbulula byavula kukila byonse muntu byo akonsha kuuba nangwa kwaamba pa kimye kiji kyonse, mambo bantu babena kupembelela kumona Anweba. Kabiji twimusachila Anweba mambo a kuuba mba kuji babena kuketekela, babena kukeba kumonapo kintu kimo kumweka. Kabiji umvwe bantu banji na kilaka kya kintu kimo, kwazhika kwita kukwabo Kwazhika, kwafwainwa kwikala Kwazhika pa kwitabizha kuloolo lwito. Ao oene mambo otwayishila kuno bufuku buno, mambo kyajinga pa michima yababo bamingilo, kabiji ne bantu, pa kwitwita pamo pakuuba mba twimwimpuzhe Anweba tutalwepo bulongo ne bya mapesho, twaketekela mba Anweba musakubuka bakolwa kabiji ne kupulusha balubilamo, kabiji amba musakusolola Kyambo Kyenu.

<sup>2</sup> Kabiji twalomba, Taata Wamwiulu, amba Anweba musakupana kikye kwi atweba byo tubena kupembelela pe Anweba nsatwikepesha, bufuku pa bufuku. Mwane kwikale kwabaya akwa—akwa kwitulwilwa kwa Mupashi Wazhila, kabiji muntu yense ekale wampofuka ku kyonse kibazhokoloka kanatu yeka Lesa. Mwane kwikale kujila kukatampe mukachi ka bantu, baji na kilaka kyakwa Lesa, posotu kwakonsha kwikala kusangululwa mu kyaalo kyonse muno kabiji kipwilo kyonse kikekale kyayulamo bantu, babi bajijilenga Lesa kwi bobila lusa, kabiji—kabiji ne Mupashi Wazhila kubuka bakolwa, kulengela bilema kwenda, kabiji ne kusangula bafwa, kabiji ne kuswisha bibye bintu byo mwalaya mu Kyambo Kyenu.

<sup>3</sup> Iyai, Nkambo Yesu, mufikizhe mulaye Wenu. Iyai kwi atweba bufuku buno. Twaketekela mba Anweba mwi umotu keesha, leelo, ne myaka yonse, ne kuuba mba milaye Yenu kechi yakonsha kukakalwa ne. Byonse meulu ne ntanda bikakalwa pakuuba Kyambo Kyenu kechi kikakalwa ne. Lekai ng'umvino yetu inshikulwe. Lekai aye Mupashi Wazhila eye aale kitendekesho. Lekai kukwatakanya kwetu kunshikulwe ku Mupashi ne kubulme bwakwa Lesa bufuku buno, kuuba mba Aye asolole Byambo Byanji byalailwe kupichila mwi atweba. Mambo twaimpuzha bino Mujizhina ja Yesu. Amena.

<sup>4</sup> Pano, bufuku buno, anweba mulondaizha kibaba, twayai tuzhikule mu Baibolo mu Buuku wa Petelo Wakibiji, kabiji ne kutatwila pa veeleshi wa 15, ke jshindatu ja kwambilamo pa Kinembelo mu bimyetu bicheche.

*Kine Amiwa nkateshanga muchima nakwimubulabula namba pa kufwa kwami moba onse mukayuke kwibivuluka bino bintu.*

*Mambo atweba kechi twalondejile mashimikala abujimuku, ne bishimi byo bashimikile bantu ne, mambo atweba byo twimubujile mambo abulume kabiji ne kwiiya kwa aye Nkambo yetu Yesu Kilishitu bino atweba bene twaji batumonyi bakumona na meso lukumo lwanji lukatampe.*

5 Natemwa kyokyo, “bakumona na meso.” Kechi byakushimikilwatu ne. Atweba twi batumonyi ba byo tubena kwambapo.

*Mambo aye watambwile kwi Lesa Shanji munema ne lukumo, kabiji kwaishile jivi kwi aye jafumine ku alwa lukumo lukatampe lwakila ja byonka bino amba, Uno ye Mwanami ye natemwa, mo Namwena lusekelo.*

*Kabiji ne jije jivi twijumwine atweba bene byo jafumine mwiulu, byo twajinga nanji ku awa mutumba wazhila.*

*Kabiji pano tuji na mambo alumbululwatu a kine kine a bungauzhi; ku oo mambo umvwe mwauba bulongo anweba mwatako muchima, nobe ku kyeya kisamina pa . . . patu pafita, posotu bukakye, kabiji ne ntaanda wakumakya akasele mu michima yenu:*

*Kabiji patanshi muyuke kino, amba kafwako bya bungauzhi bya mu bilembelo byaishile na kwibisolomona ngauzhi mwine ne.*

*Mambo bya bungauzhi kechi byaishilepo mu bimye byakala mu kyaswa muchima wa muntu nangwa jimoto ne: bino bazhila bantu bakwa Lesa baambile monka mo bebatwajiletwajile ku Mupashi Wazhila.*

6 Aye Nkambo a bikepo mapesho Anji pakutanga kwa Kyambo Kyanji. Pano, Amiwa nsakusenda kikye kwikala ke mutwe: *Lesu Wiilumbulula Aye Mwine.*

7 Tubena kwikala mu kimye kya makatazho. Tubena kwikala mu kimye akyo mwanamulume ne banabakazhi kechi bayuka kya kuuba ne. Bintu byonsetu, bi—bi mwekatu nobe byavulang’ana. Bintutu byonse, bimweka nobe kuji mashinda avula bingi mwakwibimwena. Ao ke Satana, ye uba byo byo.

8 Pano, Lesa kechi wakonsha kupingula bantu mubololoke ne, kijitu bulongo, kana kwaikalapo kipimo kimo akyo Aye kyo akonsha kwingijisha pakuuba mba ebapingule. Kabiji aye Baibolo waamba mba Aye ukapingula muntu mwi Yesu Kilishitu, kabiji Yesu Kilishitu ye Kyambo. Mu Yoano Wazhila, kypapitala kyabu 1, Kyaamba mba:

*Mu ntendekelo mwajinga Kyambo, ne akya Kyambo  
kyajinga na Lesa, ne kyokya Kyambo kyajinga Lesa.*

*Kabiji ne kyokya Kyambo kya alwilwe ke muntu, ne  
kwikala waikelenga muno mwetu, . . .*

<sup>9</sup> Pano, musango yense ye tujimo leelo ke kumweshiwa kwa milanguluko Yanji. Mwi Lesa. . . Patanshitu Aye kechi wajinga Lesa ne, Lesa, Aye twakonsha kumutela mba “aye Umo Wapenape.” Aye kechi wajinga Lesa ne, mambo kyambo (kyambo kya Kizungu) *Lesa* kyalumbulula mba “kintu kyo bapopwela” kabiji kechi kwajingapo kintu kya kumupopwela Aye ne. Nanchi Aye wajinga awa Umo Wapenape, aye—aye yoiine Nsulo ya maana onse. Kabiji mu iye Nsulo ya maana kechi kwajingapo nangwa ka atomu, molekya, nangwa kimotu ne, kechi kwajingapo kyeya nangwa kutu kumo ne, kabaangabanga, ng’ondo, kafwako nangwa kikwabo kyajingako ne. Lesa, ye twayuka amba Lesa, awa Mupashi mukatampe wajinga Wapenape (kechi uji natatwilo ne, kechi uji nampelo ne), Aye wajingako. Kabiji mwi Aye mwajinga milanguluko: kyajinga milanguluko pa kuuba mba ekale Lesa, pano monka mu milanguluko Yanji mwajinga ne bu Taata, milanguluko yakwikala bu Mwaana, milanguluko yakwikala bu Mupulushi, milanguluko yakwikala Ubuka. Aye yonse milanguluko yajinga mwi Aye. Kabiji pano Aye. . . Abye bintu bya letwa patoka kufuma ku kyokya kimye ke milanguluko Yanjitu ibena kusololwa.

<sup>10</sup> Pano Monekitazha, *maatilibbyuti* ajinga Yanji “milanguluko.” Kabiji akyo—akyo *kyambo* ke “mulanguluko wasololwa.” Kabiji nanchi abya byajinga mu ndangulukilo Yanji. Kabiji byo Aambile mba, “Kwikale,” kabiji kyaikele konka. “Kwikale,” kabiji kyaikele konka.

<sup>11</sup> Kabiji pano, vulukai, anweba Benakilishitu mwajinga milanguluko Yanji ntanda kasa ikyengye kwikalako. Kabiji anweba mwi kusololwa kwa ndangulukilo Yanji. Kasa kukyanye kwikalane ne ntanda, mwajinga mwi Kilishitu, (amena) mwi Lesa mu ntendekelo. Akyo kimulengela anweba kwikala, nanchi, monai, ba mu bumfumu Bwaji. Kabiji kintu kyonse ke Lesa, Ayemwine, kumweka patoka Ayemwine pakuuba mba bakonsha kumukwata, kumweka, kabiji—kabiji ne bikwabotu. Kabiji abyo Lesa byo byoaji, kintutulu kyonse.

<sup>12</sup> Pano bantu baamba mba, “Aya ndumbulwilo. . .” Naambilenga kuno kechi papita bimye byavula ne mu mpwijilo, muntu umo waambile kwi amiwa, amba, “Mulongo Branham, uji na ndumbulwilo ingi. Obewa kechi ulumbulula Kyokya bulongo ne.”

<sup>13</sup> Pano, tumvwa. . . Baya ku Methodist, kabiji baamba mba “Ba Baptist kechi balumbulula bulongo ne.” Ba Baptist baamba mba, “Ba Pentekosito ine.” Ba Pentekosito baamba mba “Ba—

ba Oneness ine.” Ba Oneness baamba mba, “Ba Assemblies ine.” Kabiji bonse baamba mba bakwabo ine.

<sup>14</sup> Lesa Wiilumbulula Aye Mwine! Aye kechi ukeba muntu uji yense ku Mulumbulwilako ne. Aye uba ndumbulwilo Yanji Mwine. Ing’anyi muntu wakonsha kulumbulula Lesa? Lesa Wiilumbulula Aye Mwine.

<sup>15</sup> Pano, Petelo ubena kwamba papo, twatana kuuba mba mu ntendekelo Lesa byo aambile mba, “Kwikale kyeya,” kabiji kyeya kyaikeleko, ayo yo ndumbulwilo yakyokyo. Umvwe Lesa waambile kintu kiji kyonse kabiji kyamwekele, nanchi ayo yo ndumbulwilo ya Lesa amba Kyambo Kyanji kiji bulongo. Mwamona? Pano byo Aambile mba, “Kwikale kyeya,” akya kyajinga mu milanguluko Yanji patanshitu kasa kukyanye kwikalako kintu kitelwa mba kyeya ne. Byo Aambile mba, “Kwikale kyeya,” kyeya kyamwekele mwiulu, ako kokulumbulula. Kafwako nangwa umo wakulumbulula kyokyo ne, mambo Lesa wikyambile byobyo kabiji kyaikeleko. Umvwe Lesa waamba kabiji kyamweka, ako kokulumbulula kwa Kyambo Kyanji. Kika bantu kyo babujila bakonsha kumona kyokyo ne? Kika bantu kyo babujila kumona kyokyo?

<sup>16</sup> Umvwe Lesa walaya kabiji waamba mba... Mu—mu ntendekelo, mu Genesis, Aye wapaine Kyambo Kyanji nkulo pa nkulo monka Mokyashijilenga kufumatu ku ntendekelo kufika ne kumpelo. Kabiji, kwiya kupita mu onse mankulo, kipwilo kya ntanda kyamvwangakanyatu bintu byonse namambo abisho, kabiji ne bikwabotu, kabiji Lesa kimye kyonse pa kyonka kya kimye utuma, kufumatu ku Lulayang’ano Lwakala ne Lupya, bangauzhi! Kabiji Kyambo kyakwa Lesa kiiya kwi ngauzhi. Kabiji pano Kyubiwa byepi? Kisolola Kyambo kya Lesa. Lesa usololwa, akyo kyokibulang’ana kana akyo kintu kiji bulongo nangwa ine. Kafwako nangwa umo Wiikilumbulula ne, Kyambo Akyokine kiilumbulula. Lesa wikilaile kabiji akya kyamweka!

<sup>17</sup> Pano ng’anyi buwame bokyuuba pa kwambapo kintu kikwabo pa Kikye? Ing’anyi ao muntu ndengamambo wakonsha kweseka kwambapo (umvwe Lesa waile kabiji Lesa wiyuuba) amba akwa kulumbulula kwatama? Awa ke Lesa Ayemwine ubena kuuba ndumbulwilo Yanji Mwine, kulumbulula. Aye kechi ukeba muntu mukwabo ku Mulumbulula, Aye wiilumbulula Ayemwine kupichila mukusolola kyokya Aye kyo alaile amba Ukooba.

<sup>18</sup> Oo, inge kipwilo kyonsha kumona kyokyo kabiji ne kumona milaye ayo yapainwe pa nkulo pa nkulo! Onse akwabo mankulo, Lesa utuma pa kyonkakyo kimye (kupita kufika ne mu mankulo sebeni a bipwilo) kabiji wasolola bintu byonse abya byo Alaile kuuba. Bintu byonse, kechi pajipo kintu kyashalapo kubula kubiwa ne. Byonka byobijitu! Abya byo Aambile amba Ukebyuuba, kabiji Aye wibyubile.

<sup>19</sup> Mambo Lesa byo aambile, kunyuma akwa mu Isaya, Waambile mba, “Kisungu ukemita,” kabiji kyamubijilwe. Pano, ng’anyi—ng’anyi wakonsha kulumbulula kyokya? Lesa wapaine kilumbululo. Waambile mba, “Kisungu ukemita,” kabiji waimichile. Pano, obewa kika kyo . . . kechi wakonsha . . . Kafwako kya kwambapo pa kyokyo ne, mambo Lesa waambile mba kikamubilwa kabiji kyamubijilwe. Bino kipwilo kyajinga bingi na bumpofu pakyokya kimye pa kuuba mba be kimone. Mwamona, bajinga na milanguluko yabo pa kikyeye. Kyajinga kya—kyapusesha bingi na mo baketekejilenga.

<sup>20</sup> Petelo papo watongwelenga kunyuma, waambile mba, “Lesu wasolwele Kilishitu konka ku Kyambo Kyanji, Waambile mba, ‘Awe ye Mwaana Wami ye natemwa.’” Abo baitabila baimene ponkapa. Kabiji Kilishitu wajinga ke kusololwa kwa Lesa. Aye kimye kyonse wasololwe Kilishitu mu Kyambo Kyanji, mambo Kilishitu ke Kyambo. Aye kimye kyonse wisolola.

<sup>21</sup> Aye byo aambile mba . . . Mu moba akwa Nowa, Kilishitu wajinga mwi Nowa. Mwikiketekela akyonyi? Nowa waambile mba, “Mvula ikanoka. Kukekala mvula, ntanda ikonaikwa.” Yanokele. Akyo kechi kyakebelenga ndumbulwilo iji yonse ne. Yanokele mambo Lesa, mwi Nowa, waambile mba, “Mvula ikanoka.” Aye wajinga ngauzhi, kabiji bukamonyi bwajinga kuuba mba kyo aambile kyaishile kufikizhiwa. Nanchi kechi bakebe ne kulumbulula kyokyo ne.

<sup>22</sup> Bamo mwi abo baesekele, kulanguluka, baambile mba, “Awe muntu kechi wayuka kyo abena kwambapo ne.”

<sup>23</sup> Bino Lesa kimye kyonse walailenga, “Umvwe mukachi kenu mwatanwamo umo wa bumupashi, nangwa ngauzhi, kabiji ne kyo aamba kyaiya kyafikizhiwa, nanchi mumvwai.” Kijitu bulongo, mambo kya bukine. Kyafwainwa kwikala monka mwaila Kyambo. Kabiji Nowa wajinga monka mwaila Kyambo. Kimye kyo aawile mba ikanoka, kabiji yanokele. Akyo kechi kyakebelwenga kulumbulula ne, mambo kyaubilwe monkamwa.

<sup>24</sup> Isaya waambile mba, “Kisungu ukemita,” kabiji kya mubijilwe. Bino, akyo kyakijishe mukupusanako. Mambo, monai, pajinga ma aduleedi a myaka yavula bingi kulutwe awe kisungu kasa a kyangye kwimita.

<sup>25</sup> Kyajinga bingi kyapusanako posotu mwanamulume wawama wajizhina ja Yosefwa, mulume wanji, “byo ajinga muntu waoloka kabiji kechi wakebelenga kumulengeshu buvu mubantu ne . . .” Awa muntu wawama mu oa moba, kyafwayijilwe kwikala ne yosefwa byo amukobekejile, byo amwipangwizhe Maliya.

<sup>26</sup> Bamwipangwizhe. Mu oa moba, konauna kyokya, kijitu pamo nobe walenga bukende. Kabiji, nangwa byonka byo, kwi Yosefwa, kyamwekele nobe Maliya wamwingijishenga kufyaminamo, nangwa kumulenga amweke nobe ye bukikizhi

bwa bubu bwanji, mambo watainwe kuuba mba uji na mwaana, kasa abulwa kusongolwa, bino bamukobekelatu. Bujimuku bwa byobya, bafwainwa kumwasa mabwe wafwa; byo kyafwayijilwe kwikala, mwaila mizhilo.

<sup>27</sup> Kabiji Yosefwa, mulume wanyi, wajinga muntu waoloka, ke muntu waoloka bingi. Aye waitabijile Lesa. Kabiji byo amutajilenga na oa meso abutemwe, meso anekena abaya, ne kwaamba mba, “Yosefwa, Ngabaliela awa Malaika mukatampe wapepwile ne kumbula mba Ukekala na jimi, kasa nabula kuyukapo nangwa mwanamulume umo ne.”

<sup>28</sup> Pano, inge Yosefwa watajiletu kunyuma mu Kinembelo, ngauzhi waambile mba ukoba byobyo! Kyajingatu Lesa kulumbulula Kyambo Kyanji Mwine! Mwamona? Bino kyajinga kyenye bingi.

<sup>29</sup> Alo lolukatazho lutanwa mu nkulo iji yonse. Akyo Kyambo kya Lesa ke kyenye ku bantu; Kyaikesha kyenye. Lesa kimye kyonse uba byenye. Pekala bukyenye ponse paji Lesa. Kikala kyapusanako na nyingijilo ya pantanda, mambo a kuuba mba abo baji na mashinda mo balangulukila mba mo byafwainwa kubilwa. Pakuuba Lesa waiya kabiji wauba kintu kyenye.

<sup>30</sup> “Pano ngaawe kisungu wakonsha kwimita byepi?” Aye wajinga wabukishika, aye wakebele Lesa pa kikyee.

<sup>31</sup> Kabiji Lesa waambile naji mukiloto, ne kwaamba mba, “Yosefwa, obewa mwaana Davida, kuchina kumulajika mukazhobe Maliya ne, mambo awa ye aimita munda mwanji ye wa kwa Mupashi Wazhila. Lesa wamunyeng’amina. Akye kyo kikyuuaba.”

<sup>32</sup> Mwamona Lesa byo aubile ne Yosefwa popa? Mu jishinda ja bubiji, mu jishinda ja kiloto. Bino, twayuka mba kuji biloto, twaketekela mu biloto. Naketekela mu biloto. Kiji. . . Lesa kimye kyonse waingijile na bantu mubiloto. Bino biloto ke jishinda ja bubiji, mwamona, kyakonsha kwikala kyakine nangwa kyatama kanatu kyalumbululwa. Bino aye kechi wakebelenga kulumbulula kuji konse ne. Kyajinga Aye mwine Lesa kwamba nanji Yosefwa, mambo kechi mwajinga ngauzhi muntanda mu oa moba wakulumbulula ne. Kechi kwajingapo ngauzhi pa myaka foolo aduleedi ne. Nanchi kyawama kyalondejilepo, akyo Lesa kyo alamawizhe buwame, bwa Mwaana Wanji Mwine, ke kwamba kwi Yosefwa kupichila mu kiloto kabiji kwakubula kulumbulula. Aye waambile mba, “Aye mwanamukazhi wajingatu bulongo. Akya Kintu Kyazhila kyo aimita munda mwanji ke Mwaana wakwa Lesa.” Kechi kyakebelwenga kulumbululwa kuji konse ne.

<sup>33</sup> Lesa uba ndumbulwilo Yanji Aye mwine ku bakishika, michima ya bukishika. Banabalume ne banabakazhi aba batala pa abya—abya bintu byabu kyafyamika, inge wi wabukishika ne wabukine kabiji waketekela, Lesa uji najishinda ja kwi

kilumbulwilamo kwi obewa. Patanshitu, kebai kana kiji mu mulaye. Inge Yosefwa wabweleletu kunyuma ne kufuma kubisho kabiji ne kubwela ku Baibolo, kabiji ne kutana kuuba mba, Isaya waambile mba ukoba kyokyo.

<sup>34</sup> Kabiji ne byobya bintu byaambiwepo, ne kusemwa Kwanji, kabiji ne byonse pa kikye byaambiwepo mu Binembelo, “monka mu bangauzhi bazhila,” nobe kwamba kwakwa Petelo. Kabiji kechi kujipo muntu uji nasambu ya kubikapo kulumbulula kwa bumuntu pa kikye ne. Bijitu byonka Lesa byo e byambile mba bikobiwa. Aye wajinga kusololwa kwa Kyambo kya Lesa kyalailwe mujoja juba. Lesa wikyambile, nanchi ibyo byo kyaikajile. Apa pooka popapwijile byosetu.

<sup>35</sup> Yesu waambile mba... Kimye kyo ajinga pantanda, byo babujile kumvwa nyingijilo Yanji, kyajinga kyabaya bingi, kyajinga kintu kipya, (abo kechi bakonsheshe ne), kyajinga kintu kipya, nangwa byonkabyo. Abo kechi bakonsheshe kumumvwa Aye ne. Aye waambile mba, “Kebakebai mu Binembelo!” (Naketekela mba kechi Mbena kwimuzhikaula na kyongo kikatampe kooko ne, Kwambisha mukyokyo ne.) “Kebakebai mu Binembelo, mambo mwi Abyo mulanguluka mba mo mo tumwena Bumi Bwapenape, nanchi ibyo bibenakunshimuna Ami.” Mwamona? “Ibyo Bibena kwi mubuula mba Yami Ng’anyi.”

<sup>36</sup> Monai, Lesa wapaine Kyambo. Aja juba jajingamo ja kwisolola Lesa, Lesa (Emanuele) tuji nanji, “Jizhina Janji jikatelwa mba Wakukumya, Upana maana, Mfumu wa Mutende, Lesa wa Bulume, Shabantu wa Myaka. Kabiji Jizhina Janji jikatelwa mba *Emanuele*, ‘Lesa tuji nanji.’” Lesa wajinga mwi Davida. Lesa wajinga mwi Mosesa. Lesa! Awe ye Lesa kimye kyonsetu, na kwisolola Ayemwine mu yoya nkulo. Pakuuba aye nkulo, “Kisungu ukemita kabiji ukasema Mwaana wamulume, kabiji Ukekala Lesa tuji nanji.”

<sup>37</sup> Akyo ikyo Aye kyo bamwipaijilepo, kwialula Ayemwine Lesa, kabiji ne pa kuzhilulula Sabado. Aye wajinga—Aye wajinga Lesa wa Sabado, kabiji Aye wajinga Lesa. Kabiji Aye kechi wajinga muntutu ne nangwa ngauzhitu (nangwa byonka byo Aye wajinga Muntutu kabiji Ngauzhi), bino Aye wajinga Lesa—Ngauzhi. Kabiji Aye wajinga kokufikizhiwa kwa Kyambo, monkatu mo aambijile Lesa amba ukoba. Waambile mba, “Bang’anyi mwi anweba bakonsha nkuzhachisha Amiwa na bubu? Kebakebai mu Binembelo! Mulanguluka mba Mwi Abyo mo motumwena Bumi Bwapenape, nanchi Ibyo bibena kunshimuna Amiwa.” Pakuuba bisho byabo, baikelenga mukivule kya nkulo ikwabo.

<sup>38</sup> Nobe byo nasapwijilenga milungu yapitapo kunyuma, “*Kwikala mukilola.*” Kilola ke “kubekuka,” juba jibena kwibekula ajo jine, kabiji ke bubela. Kabiji kilola kya nkulo

ikwabo ke kubekula kwa bubela. Bantu bimye byonse benda mukintu kyamwekele myaka yapita kunyuma. Abo bena Luther babena kwenda mu kilola kya bena Luther. Luther mu juba janji kyeya kyajuba kyajitu bulongo; Wesley wajinga wawama mu juba jaji; ba Pentekosito wawamine mu juba janji. Tubena kuya peulu na kukajila ndandalashi, tubena kwikala mu nkulo ikwabo! Atweba tubena kuya, kuya, kechi twakonsha kutwajijila na kutala panyuma ne.

<sup>39</sup> Umvwe atweba bene twaikajikwa mu bintu, tulanguluka mba tuji nabyo byonse, tusenda bisho byetu twipombamo; kabiji abyo byajingatu bulongo mu joja juba, pakuuba pano tubena kwenda kuya kulutwe! Kebakebai mu Binembelo mumone bya lailwa jaleelo, nanchi popo tuyuka pepi potuji, nanchi popo tuyuka pepi po twaimana.

<sup>40</sup> Luther; mwakonsha kumona mu Kinembelo ne kumona kyokyo—mu nkulo ya Saladisa, mwakonsha kumona kine byonka byo kyalailwe. Talai ng’anyi musango wayewa waendelenga pa mbili, monai kyaile nakumukumanya, kine, “bujimuku bwa muntu,” kushimukulula. Talai Wesley, ne bakwobotu. Byo kyaishile panshi kufika ku nkulo ya Pentekosito, kabiji kupita muyoya nkulo, monai byo yaendele. Talai mu Binembelo ne kumona pepi po twafika. Ao oene mambo Yesu waambile mba, “Kebakebai mu Binembelo!”

<sup>41</sup> Monai pepi po tuji! Naketekela mba tuji pa Kwiya kwa Mwaana wa Lesa ponka pano. Naketekela mba tuji ponkatu pa nkulo ya—ya yeka awala Yoafwainwa kumwekelapo kimye kiji kyonse. Naketekela mba Binembelo byamwesa kyokyo, amba tuji mu maawala apelako a jishimikila ja ino ntanda. Mbena kumona bintu byo bibena kunungakana pamo. Monai akye Kinje kya Bupopweshi kibena kutangijila bipwilo byonse kutwelamo, kutwela mu kiyukilo kya lukinyama. Kabiji monai Bumfumu Bwakiloma kabiji ne byo bubena kuba, kabiji ne bonse bashala. Bamonai bonse kwiya pamo, na kushikila Kyeya, kushikila Mambo awama. Muntu yense ukakebewa kwikala kulubaji lwa kikyey kabiji ne kwenda mu byeya byabo inge ne kechi ukenda ne. Monai, tuji mu kimye kya kumpelo. Kechi kujipo kintu kyakitushajila atweba ne kanatu ku kwachijila kwi Nkambo ne kuketekela Kyambo Kyanji. Akyo Kyambo kimye kyonse kijitu bulongo.

<sup>42</sup> Mu nkulo ya kipwilo kya Laodikeya, aya yajinga yo yonka nkulo ya kipwilo, pa onse, yabikile Kilishitu pangye ya kipwilo. Aye wajinga pangye, na kunkokosha. Kika kyamwekele? Akye Kinje kya Bupopweshi ikyo ki Kamubika kuusa. Aye Baibolo waamba mba Ukekala pangye, kabiji byobyo Aji. Kika kyo banshikila pangye? Akyo Kyambo. Kabiji Aye ye Kyambo, Aye kimye kyonse wajinga Kyambo, kabiji Aye ukijitu Kyambo bufuku buno! Aye iye Kyambo.



43 Aye Baibolo waamba mba, “Akyo Kyambo kyakila kutwa, kyakila mu bulume pa ponko yatwa-kubiji,” Bahebelu, kyapitala kya bu 4, “o apima milanguluko ne kulondalonda mwaya muchima.” Akyo Kyambo byo kyajinga! Bafwayijilwe kuyuka Awe Yeng’anyi kimye Yesu kyo aambile kyokya mu joja juba.

44 Monai byo Aubile. Juba jimo Waimene popa, tatwilotu itanshi ya mwingilo Wanji. Kwajingapo muntu umo waishile kwi Aye, wa jizhina ja Shimona, Shimona Petelo. Kabiji Petelo byo atajile pe Aye ne—ne ku Mumona, Yesu wa mwaambijile mba, “Jizhina jenu mwi Shimona kabiji anweba mwi mwaana Yona.” (Wafwayijilwe kuyuka mba Mosesa waambile mba, “Aye Yehoba Lesa wenu ukemutumina Ngauzhi wamusango wami, kabiji aye kamumvwai.”) Kabiji pano paji Muntu ao wabujile kumumonapo kala mu bumi Bwanji, waamba mba, “Jizhina jobe wi Shimona kabiji wi mwaana Yona.” Kika, ponkapatu wayukile mba awe kuuba waikala mukwabo...Kechi bajingapo na ngauzhi pa myaka ma aduleedi ne, kabiji pano paji Muntu ubena ku mubuula byo anji. Oene mambo kechi kyaji kyakukumya ne byo ekitambwile!

45 Filipai, pa kyokya kimye, waile kabiji—kabiji wataine Natanela mushi ya kinchi, kabiji wa mubwezhhezhe kwi Yesu. Yesu waambile mba, “Talai mwina Isalela mwabula nangwa bubu ne.”

Aye waambile mba, “Labbi, kimye ka Anweba kyo mwangyukile?”

46 Aye waambile mba, “Filipai kasa akyangye kukwita, kimye kyo wajinga musshi ya kinchi, Najikukumona.”

47 Aye waambile mba, “Labbi, Anweba mwi Mwaana wakwa Lesa! Anweba mwi Mfumu wa Isalela.” Aye wayukile mba byobyoby aji! Kika? Kechi kya kebelwenga kulumbululwa ne, Yehoba ye waambile kyokyo!

48 Apa paimene boba babujile kwikitabila ne. Abo baambile mba, “Awe Muntu ke Zelebabuba. Aye uji—Aye uji na kamusango kamo ka bujimuku ka kundoosa. Aye—Aye ke muntu ubulang’ana bintu byakulutwe, nangwa kintu kimo.”

49 Yesu watajile pe abo, ne kwaamba mba, “Kika, kwamba kyokyo kutazha ku Mwaana wa muntu, mambo akemulekelwa. Pakuuba Mupashi Wazhila byo akeya kuba kintu kimo, kwamba kutazha kwi Aye, ao mambo kechi a kalekelwa ne, mu ino ntanda nangwatu mu ntanda ikeya ne.” Aye wa awilenga kutazha ku juba jetu, juba jo twakonsha kumona. Mambo Aye ujitu pamo keesha, leelo, ne myaka yonse.

Vulukai, kyajinga Yesu Kilishitu awa wajinga mwi Mosesa.

50 Kyajinga Yesu Kilishitu awa wajinga mwi Davida. Kimye Davida, aye mwaana wakwa...Davida byoaille peulu ya mutumba, mfumu ye bankana, kabiji wajijile pa kutala

Yelusalema, awa kechi wajinga ungi ne kana Kilishitu mwi aye. Pakupitapo myaka nobe eiti aduleedi kulutwe, Mwaana wakwa Davida waiketele peulu ya Mutumba wa Olobeta kabiji watajile pa Yelusalema kabiji wajijile, ne kwaamba mba, “Yelusalema, Yelusalema, bimye binga Amiwa byo kemufukamina nobe Kyaje pa make anji, bino anweba kechi muswa ne!”

<sup>51</sup> Kimye Yosefwa kyo ajinga mu kaleya, awa wajinga Yesu. Kimye kyo bamupoteshe pepi nobe mali a masiliva sate, awa wajinga Yesu. Kimye kyo ajinga muntu wakwa Potifelo, awa wajinga Yesu. Kimye kyo ajinga ku kuboko kwa kilujo kwakwa Felo. Kabiji kimye kyo afuminepo, muntu yense. . . .tolopita yavumine, kabiji muntu yense wafukamine jinungo, awa wajinga Yesu. Kafwako muntu nangwa umo wakufika kwi Felo ne kanatu kupichila—kupichila mwi Yosefwa; kafwako muntu wakonsha kwiya kwi Lesa ne, kanatu kupichila mwi Yesu. Wajinga Yesu, Kyambo kyaawilwe kyafikizhiwenga, kyaambilwe mu bivule ne mubipasha.

<sup>52</sup> Kimye Yesu byo ajinga pano pantanda, Aye waubile bintu bimo bangauzhi byo baubilepo, oene mambo kyo bayukijile mba Aye wajinga Lesa kusololwa Kyambo Kyanji. Kechi kyakebelwenga kulumbululwa ne.

<sup>53</sup> Kimye Natani kyo amwene bibye, waponene panshi, ne kwaamba mba, “Anweba mwi Mfumu wa Isalela, awa Mwaana wakwa Lesa, Mfumu wa Isalela. Twimuyuka Anweba, kafwako muntu wakonsha kuuba kikye ne.”

<sup>54</sup> Nikondema waishile bufuku, waambile kitu kimo kya ba Faliseo. Bino, mwamona, bajinga bakaswa bingi ku Kinje kyabo kya Bupopweshi kyakuuba mba kechi bakonsheshe kwi Kitambula ne. Aye wasolwele byo baambile, amba, “Labbi, atweba. . .” Ng’anyi we “atweba”? Kinje kyabo! “Atweba twayuka mba Anweba mwi mufujishi wafuma kwi Lesa, mambo muntu kechi wakonsha kuuba bibye bintu ne kana Lesa uji Nanji.” Abo Bekiyukile, bayukile mba byo Kiji, bino abo bajinga bakasa bingi mukikye.

<sup>55</sup> Kabiji Lesa, mu myaka foote yapita, wasukanya kino kyaalo na lubatizhilo lwa Mupashi Wazhila, kabiji banabalume ne banabakazhi ba kijitu pangye Yakyo mambo bakaswa mukintutu kimo, kwikala mukilola kya juba jikwabo. Lukatazho lweepi? Muntu yense ubena kukeba kwikala waki Methodist, Baptist, Presbyterian, Letheran, nangwa kintu kimo. Monai, ke kilola.

<sup>56</sup> Baikelenga mu kilola kya juba jakwa Mosesa. Kika Aye kyo aambile? Aye waambile. . . .Baambile mba, “Atweba twi banababwanga bakwa Mosesa.”

<sup>57</sup> Aye waambile mba, “Inge mwamuyukile Mosesa, umvwe mwangyuka ne Amiwa. Mosesa wanembele pe Amiwa!”

<sup>58</sup> Inge mwayukile Luther, mwafwainwa kuyuka ino nkulo! Umvwe mwayukile Methodist, inge mwayuka ino nkulo! Mambo Kilishitu wanembele ino nkulo! Abye Byambo bibena kufikizhiwa byafwainwa kufikizhiwa mu ino nkulo. Kechi kikebewa ne muntu umo kwi Kilumbulula ne, Lesa uba ndumbulwilo Yanji Mwine. Lesa wilumbulula Ayemwine, mambo Ye Yekatu wakonsha Kwikilumbulula. Lesa milaye yanji kimye kyonse ishiniikisha byo Aambile, kabiji aya yo ndumbulwilo.

<sup>59</sup> Pano, Yesu, (kashako kimye), Yesu waambile mba, mu Yoano Wazhila kyapitala 14, na veleeshi wabu 12, “Aye waitabila mwi Amiwa, mingilo Amiwa yo nguba ne aye ukeyuba.” Bushe Aye wikyambile? Abyo ibyo. Akyo kechi kikebewa kulumbulula kuji konse ne. Umvwe muntu umo waingila awa mwingilo, awa ke Lesa. Kyakine!

<sup>60</sup> Aye kabiji waambile monkamwa mba, “byonka byo kyajinga mu moba akwa Lota, byobyo kikekala ne pa kimye kya kwiya Mwaana muntu.” Yesu waaambile kyokyo. Bushe wikyambile nyi? Kyakine, Aye wikyambile! Akyo kechi kikebewa ne kulumbulula ne.

Baamba mba, “Kyawama, akyo kyalumbulwile. . .”

<sup>61</sup> Kyalumbulwile byonkatu byo Aambile! “Byonka byo kyajinga mu moba akwa Lota, byo byo kikekala ne pa kwiya kwa Mwaana muntu.” Pano nga mu moba akwa Lota? Twayai tubwele kunyuma pa kimye kicheche, muyuke byo baubilenga.

<sup>62</sup> Kwajinga misango yabantu basatu mu moba akwa Lota: waitabila, kitabila-mbijinga, kabiji ne wabula lwitabilo. Akyo kijitu mujibumba jijijonse, kintutu kimo.

Twatana kuuba mba bena Sodoma bajinga babula kwitabila.

Lota wajinga kitabila-mbijinga.

<sup>63</sup> Abulahama wajinga waitabila. Aye iye lulayang’ano ko lwa shiniikishiwe. Aye iye wapembejilenga mwaana wamulume walailwe. Aye iye wikiketekejilenga. Amena. (Amiwa kechi mbena kwi ambila amiwa mwine amba “amena” ne. *Amena* kyalumbulula mba “Kikale byonkabyo!”) Kabiji abyoy ibyo. Abulahama kechi wajinga mu Sodoma ne. Abulahama wajinga kookwa pangye ya Sodoma. Aye ke kipasha kya Kipwilo kya bumupashi.

<sup>64</sup> Lota wajinga kipasha kya kipwilo dinominesheni monka mu Sodoma. Talai, aye Baibolo waambile mba, “Bubi bwa mu Sodoma bwa manyikile mweo wa muntu waoloka pa juba pa juba.” Kika kyo abunjile kwikala wachichika bulongo pa kuuba mba ekimene kye? Kuji bantu bavula bawama baikala mu kipwilo leelo, babena kutajisha ne kumona banabakazhi bavwala tuputula kabiji ne banabalume kuuba bibye bintu,

kabiji ne bamembala babo kuya, na kuteya golufu pa Mulungu, kabiji ne bijiilo bya kukaya, kabiji kowa ne bintutu, mu kifulo kyakuya na kutanwa ku kipwilo. Kwikala ku nzubo pa Kisatu bufuku, na kutamba televizhoni, mu kifulo kya kuya na kutanwa ku kipwilo. Batundaikwa nobe bakonsha kwambapo kintu kimo pa kikye, bino kinje kya kipwilo kyakonsha kwi bapanga. Lukatazho lweepi? Ke Lota ne jikwabo, watala pangye kupichila pa windo ne kumona bubu, kabiji waumvwa moyo pa kuuba mba ateleshi bubi aamba “bubi”!

<sup>65</sup> Abulahama kechi wajinga mu bilubo byabo ne, aye kechi wajingamo na lubaji ne. Aye wajinga kipasha kya Kipwilo kya bumupashi. Pano talai byamwekele kumpelo ya kimye, mujilo kasa a kyangye kupona. Kabiji aba bajinga ba Bagentila. Kyajinga kipasha kya mujilo kuponena leelo pa ntanda ya ba Gentila, kimye ma bumfumu akonaunwa ne kunsokwa. “Meulu akekala mu mujilo,” byo byaamba Nkambo, “kabiji bakansokwa na kyuya kya malwa.” Akyo kyajinga kivule kyakyo.

<sup>66</sup> Pano twayai twibamone mukipikichala. Apo Abulahama uji kala pangye, kechi mu Sodoma ne, wajinga pangye ya Sodoma. Lota wakijingatu mu Sodoma.

<sup>67</sup> Kintu kyenye, lukeelo lumo kasa kwakaba, kyafwaijilwe kwikala pepi nobe ku ma ileveni koloko, wamwene banabalume basatu kasa beya, banabalume bonkabe, babena kwenda mu mukwakwa, mu kalolo. Abulahama waikela mushi ya kinchi kya maoka, kasa abena kukookoloka ayemwine. Wajinga ufwapo, kape na jitanga alwa lukeelo, wabwelele, pepi nobe mu kunshikimana kwa juba. Kabiji wamwene banabalume basatu kasa beya. Kabiji pajingapo kintu kimo pa boba banabalume, akya, kyavumisho bbelu. Oo, ami!

<sup>68</sup> Kimye kyonse pajipo kintu kimo na Lesa, umvwe Kyaiya ku bantu, Kivumya bbelu. Abo be Kiyuka. Pajipo kintu kimo ki babuula, pajipo kushiniikisha pa kyokyo.

<sup>69</sup> Abulahama wanyene bukiji bukiji, kabiji waambile mba, “Nkambo Yami, fikai pano kabiji ne muletelepo tu meema, ne akebe kabiji ngovwe mauulu Enu, kabiji ne Mupe mulondo washinkwa, kabiji apa bino Anweba mutwajijile kuya, mu jishinda Jenu.” Nanchi ne Aye wasendukile. Aye wanyemejile mu jitanga ne kutola mwaana ng’ombe kabiji wamwipaile, ne bamingilo yanji bamunengezhe bulongo. Watwelele mukachi ka tente, kunyuma yanji, ne kwambila Sala anengezhe bunga, ne kulengamo tuma, nangwa tubunga, ne kulengamo tubashinkwa, ne kulengamo tuba keeke pa kitofu kya kubumba. Waletele ne kupana. Kimye kyo baikela popa, na kuja, batatwile kumona, awe Mwanamulume watajilengatu jiya ku Sodoma. Kabiji waambile mba . . .

<sup>70</sup> Babiji ba mwiabo, vulukai, baile ku Sodoma. Babiji baile ku Sodoma. Nasashijila kechi akye kimupuse ne.

Amiwa mbeni kutazha ku kyaambile Yesu. Babiji baile ku Sodoma na kulupulamo Lota kabiji ne byonse byanengezhiwe kulupulwamo. Kabiji ne boba babiji baile kookwa, baile na kusapwila. (Kabiji kwajinga Umo washajile kunyuma ne Abulahama. Talai kiyukilo kyo Aubile.) Bamwene kiyukilo kookwa, kwajinga...bena Sodoma bampofwilwe meso. Kusapwila Mambo awama kimye kyonse ke kintu kimpofula meso ku wabula Iwitabilo. Kabiji monai byo kyaubiwe.

<sup>71</sup> Bino, kuji Umo waimana kunyuma kukwe kabiji waubile ne kiyukilo kwi Abulahama.

<sup>72</sup> Bino, mwamona nyi? Yense wamba mashimikila akala, ulondela Binembelo, ulondela mashimikila, kechi kwakilapo kala kimye mu mankulo abipwilo apo muntu poayile ku bipwilo bya bicheche momwa mu ntanda, amwa mu madinominesheni, kechi kwakikalapo kala muntu ao jizhina jaji jiji napelo nobe jakwa Abulahama, h-a-m, kunyuma ne. Pakuuba leelo banji na umo, G-r-a-h-a-m. Abyo ibyo. kuya kookwa, na kwibeta amba balupukemo. Aye ubena kwingila mwingilo wawama bingi kukikye. Graham, Billy Graham, kalume wakwa Lesa momwa mukachi ka madinominesheni, bamulwila ntanda, kabiji ne bikwabotu, kwamba kyakosa pa bibye.

<sup>73</sup> Juba jimo byo bamukebelenga amba emaneko pa Bundamakyaalo, aye wakanyishetu sala. Lesa, amupeshe pa kiky. Kika, atwa tupanyi twa wisiki, aye inge kechi waswishishe byo kyafwainwa kwikala ne. Bafwayijilwe kutaya ma mbilyonyi mali amadola, mambo aye inge wibifumishepo nangwa byonkabyo, atwa tupanyi twa mafwaka ne bintu biji byonkabya. Monai, aye uji momwa nobe muluwe wakwa Lesa ku Sodoma. Abyo byokiji.

<sup>74</sup> Bino vulukai, kwajingapo Umo waikela kookwa ne Abulahama, Muntu mukwabo, kechi booba babiji baile kookwa nobe basapwishi bakatataka aba baile kookwa na kusapwila ne. Monai, kwajingapo Umo waikela kookwa. Babiji baile *mujoja* jishinda, kabiji Umo waikela *kukwe* ne Abulahama. Kabiji Umo waikela ne Abulahama wapaine kiyukilo.

<sup>75</sup> Pano talai, jizhina janji jajinga "Abulama" kabiji mukazhaji wajinga "Selai," juba jimo nangwa abiji apichile kunyuma. Lesa wamumwekejile kabiji wamubujile, "Mbeni kupipula jizhina jobe kufuma kwi Abulama ke Abulahama." (Mwamona, G-r-a-h-a-m ke bisopelo sikisi, muntu.) Bino A-b-u-l-a-h-a-m-a [Mu Kizungu: "Abraham"—Wakutu.] ke sebeni, bisopelo sebeni; h-a-m, kupelako na h-a-m.

<sup>76</sup> Bino, akwa ku Kipwilo kya bumupashi, kwajinga Umo kookwa kwi Abulahama, kabiji monai Aye byo aambile. Aye waambile mba, "Abulahama," (kechi "Abulama ne") "Abulahama, mukazhobe ujipi" (kechi "S-e-l-a-i ne") "S-a-l-a? Ujipi mukazhobe Sala?"

77 Talai byo aambile, “Aye uji kunyuma Yenu me tente.”

78 Kabiji Aye waambile mba, “Nkakupepula. Amiwa nkakupepula.” Monai a kya kyaimenako bumuntu, aye Umo, mwayila yewa mulaye Ye alaile. Awa wajinga Lesa! Aye waambile mba, “Amiwa nkakupepula.”

79 Kabiji Sala, (mujishinda jo twakonsha kukwatakanya bonse) wasekele mukachi kanji, aye mwine, aye waambile mba, “Ami, mwanamukazhi mukote, uji na myaka aduleedi, nkambo yami” (ao wajinga Abulahama) “naye mukote, wapita pa kimye kya bumi kya byobyo nobe bakikwatala.” Waambile mba, “Kika, kechi twakonsha kwikala na lusekelo lwayewa musango jibiji ne, Amiwa ne mukote kabiji ne aye mukote.” Kabiji waambile mba, “Atweba kechi twakonsha kwikala na byobyo ne.” Kabiji waambile mba, “Mujishinda ka? Abye bintu kechi byakonsha kubiwa ne!”

80 Kabiji awa—awa Muntu (Lesa mu mubiji wa muntu) kabiji, “Kika Sala kyo akusekela ne kuzhinauka, kwaamba bibye bintu?” Mu tente, kunyuma Yanji.

81 Pano talai, umvwe awa kechi ye mwingilo umo ao Yesu Kilishitu ye ajinga naji ne! Aye watajile pa jibumba kabiji wayukile ne milanguluko yabo. Aye wabuujile Petelo byo ajinga kabiji ne jizhina ja bashaji byo jajinga. Wabuujile Natanela.

82 Wabuujile awa mwanamukazhi ku mushima, awa mwanamukazhi waambile mba...Aye waambile mba, “Yanga Nkandetele bya kutoma,” nangwa mba “Ndetelepo Amiwa bya kutoma.”

83 Waambile mba, “Mwane, kechi kyaswishiwa Obewa kwamba ku...anweba ba Yudeya kwaamba na mwina Samaliya ne. Atweba kechi tujipo na nyingijilo umo na mukwabo ne.”

84 Aye waambile mba, “Pakuuba umvwe Obewa wajikuyuka ye ubena kwisamba nanji, inge wangipuzha Amiwa bya kutoma.” Misambo yatwajijiletu. Aye waambile mba, “Yanga ukalete mulume obe eye kuno.”

Waambile mba, “Amiwa kechi njipo na mulume.”

Aye waambile mba, “Obewa waamba bulongo, mambo waikala na faivi.”

Aye waambile mba, “Mwane!”

85 Talai pa lupusano lwajinga pa kachi ka kyokya neabo—neabo mapulisiti bakyokya kimye, akya kinje kyaikelenga mu kilola kya juba jingi. Baambile mba, “Awe diabola!” Abo bapaine mukumbu ku kipwilo kyabo bintu bimo, mambo akyo kyakebelwenga.

86 Pano kika awe mwanamukazhi kamulanda wa kamubiji kacheche, awa Lukunwa watongwejlwe jimo wajinga monka mu muchima wanj. . .Aye wajinga wakolwa kabiji wokokele

na byobya bintu, wailenga mu mikwakwa nobe kende. Bino byo amwene Kyokya, waaambile mba, “Mwane, Nayuka mba Anweba mwi Ngauzhi. Twaikala kwakubula nangwa umo ne pa myaka foolo aduleedi, kabiji twaabulwa mba umvwe Mesiyasa waiya abye byo bintu Aye byo akooba.” Oo, ami! Awa Lukunwa wajinga momwa waikele na bumi! Kika? Kechi kyakebelwenga kulumbululwa ne.

<sup>87</sup> Yesu waambile mba, “Amiwa yami Iye ye wisamba nanji.” Akyo kechi kyakebelwenga kulumbululwa ne. Aye waubile kyakukunya kabiji ne kushimuna mba Aye ye Mesiyasa, a mena, kabiji kyapaine lushimuno monka mwalajile Lesa (“Aye Yehoba Lesa wenu ukemupa Ngauzhi uji pamo nobe ami,” byo aambile Mosesa). Kyajinga kika? Ke kushiniikishiwa kwa Kinembelo!

<sup>88</sup> Mwanamukazhi wanyemejile mu muzhi, kabiji waambile mba, “Iyai, mumone Muntu Ao waambula bintu byo Nauba. Bushe awe kechi iye Kilishitu nenyi? Bushe awe kechi Iye nenyi? Aye waambujile byo Naubile.”

<sup>89</sup> Pano monai, Yesu, awa wajinga Iye kookwa muyewa Muntu ao wajinga nanyuma Yanji yavundamina ku tente kabiji wabulang’ene bya langulukilenga Sala mukachi katente.

<sup>90</sup> Akyo Kyambo kya Lesa kyaamba mba, mu Bahebelu, kyapitala kyabu 4, amba...Yaamba bibye, “Akyo Kyambo kya Lesa kiji na bulume bwabaya kabiji kyatwisha kukila poko yatwa-kubiji, kuchibakanya kufika ne ku kwabanya kwa mikolokofwa, kabiji alondalonda ne kupima milanguluko ya muchima ne mo yaila.” Ke Kyambo! Kabiji kimye kyonse ngauzhi kyo aishile, aye waishile na Kyambo, kabiji wajinga Kyambo kya yoya nkulo. Kabiji kya ubile byepi? Wakwaula wapimine pimine milanguluko yajinga mu muchima.

<sup>91</sup> Kyaubilwe mwi Yesu Kilishitu mambo Aye wajinga kuyula konse kwa Kyambo.

<sup>92</sup> Kabiji Yesu waambile mba, “Byonka byo kyajinga mu moba a Sodoma, kabiji byo kikekala pakwiya kwa Mwaana muntu.” Aye Mupashi wakwa Lesa waishile panontanda mu musango wa bantu, Lesa wimwesheshe mu mubiji wa bumuntu (Amena! Mwikimona nyi?), kabiji amba ukoba kintu kimo Lesa kyo aubilepo mu mubiji wa bumuntu ku Sodoma. Vulukai, bapembejilenga mwaana walailwe. Kabiji, pa kupitatu kyokya, awa mwaana walailwe waishile. Akyo kyajinga kiyukilo kyapelako akyo Sodoma ne jibumba jakwa Abulahama kyo bamwene mwaana walailwe kasa akyangye kufika. Bushe mwikimona akyo nyi? Kabiji pano Kipwilo kya bumupashi kyafika pa kyokya kimye.

<sup>93</sup> Muntu umo waambile mba, “Mulongo Branham, mwajikwamba mba ‘awa wajinga Lesa?’”

<sup>94</sup> Aye Baibolo waamba mba, Wajinga Lesa! Kechi kikebewa ne kulumbululwa ne. Ye Elohimu. Aboyo Abulahama byobyo

Amwichele. Yense utanga Baibolo wayuka kyokyo. *Elohimu*, “Aye wafikilamo-mu byonse.” Aye wajinga Mutanshi, ne Wapelako; yo Tatwilo, ne Mpelo. Elohimu! Abulahama Wamutelele amba “Elohimu.” Lesa (mubisopelo bikatampe mu Kihebelu), Elohimu; nobe, “Muntendekelo Lesa,” Elohimu.

<sup>95</sup> Aye wajinga Elohimu wamwekanyikile mu mubiji wa muntu, wawala byakumvwala bya bantu, kuja kajo kabantu. Amena! Ke kiyukilo kya kubamba mumoba akumpelo Lesa ukamweka jibiji mukachi ka bantu Banji mu musango wa bumuntu! Amena! Yesu waambile mba, “Aya mingilo Yonguba ne anweba mukeyuba. Kabiji byonka byo kyajinga mu moba a Sodoma, nanchi byobyo kikekala ne pakwiya kwa Mwaana muntu.” Amena! Akye kechi kikebewa ne kulumbululwa ne; kikebewatu kumwekanyika, abyobyo kikebewa. Amena. Mwikiketekela akyonyi?

Twayai tukunyike mitwe yetu.

<sup>96</sup> Taata Wetu Wamwiulu, twapana kwi Anweba mulaye Wenu bufuku buno awa Ye mwaambilemo bibye bintu. Anweba mwibilaile. Kechi pajipo nangwa umu wakonsha kulenga Kyambo Kyenu kwikala kyumi ne kanatu Anweba. Anweba mwaambile mba, “Kwikale kyeya,” kabiji kwaikale kyeya. Kafwako nangwa umu wakonsha kwi kilumbulula akyo ne, kya mwekanyikile.

<sup>97</sup> Nobo byonka byo twaambula Isaya, ngauzhi, “Kisungu ukemita jimi,” kya mubijilwe; kechi kyakebelwenga kusololwa ne, aye kyamubijilwe. Akyo byo kyaubiwe.

<sup>98</sup> Anweba mwaambile mba, byo Akeya Ukasemekelwa mu Betelema, “Monka mu Betelema, wa mu Yudeya. Obewa kechi wi muheche wa mubilolo bya mu Yuda ne, wa mu Isalela? Mambo monka mobe mukafuma Ntangi wa bantu Bami.”

<sup>99</sup> Bintu Aye byo akooba, Aye byo akajila pa musalabo, Aye byo akazhachishiwa, kupopa mau lu Anji ne maboko Anji; “Waashilwe na mambo amizhilulwila yetu, kabiji wafumpilwe na mambo abubi bwetu; Aye watambwile lukabisho lwa kwituletela atweba mutende; kabiji mo mu bipumo Byanji mo twabukijilwe.”

<sup>100</sup> Kabiji Davida waambile mba, “kechi Nkaleka mweo Wanji mu kalunga ka bafu ne, kabiji kechi Nkaleka Umo Wazhila Wami kumona bubole ne.” Kabiji pa juba ja busatu, ma awala sebetetu kasa akyangye kufikila akuleta bubole ku mubiji Wanji ne, Kyambo kya kwa Lesa kyaamba mba, “Aye ukasanguka.” (Baambile mba mubiji Wanji ba mwibile kumufumyamo; bakijitu be kiketekela.) Pakuuba atweba twaketekela, Nkambo, Kyambo Kyenu! Kya mwekanyikile. Yesu Kilishitu wasangukile kabiji Waambile mba, “Amiwa ke... Talai, Amiwa njinenu kimye kyonse, poso kufika ne kumpelo ya ntanda.”



<sup>101</sup> Twaketekela mba Anweba muji muno bufuku buno. Twaketekela mba Anweba mu kijitu Yesu Kilishitu bufuku buno, muno, nobe Anweba byonka byo mwajinga. Kabiji Anweba mu bena kukebatu meso, maboko, mikupa, myeo, mibiji, Anweba yo mwakonsha kwingijisha kwi mwesheshamo Anwebabene. Lesa, tuzhijikai atweba bufuku buno, pakuuba mba tumone Yesu Kilishitu mumi mukachi ketu. Mulekai Aye eeye! Popo kikeya kufikizhiwa, nobe zala yaboba ba Giliki baishile mu joja juba, kabiji baambile mba, “Mwane, Twasaka kumona Yesu.” Kabiji Aye bafwainwa kumumona. Oo, kyajinga bingi kya lusekelo byo batajile pe Aye!

<sup>102</sup> Lesa, Anweba mujitu pamo leelo. Kabiji Anweba mwalaile amba umvwe twaumvwa zala Tukemumona. “Pa kakimye kacheche, kabiji ba pano pantanda kechi ba Nkamona ne” (babula kwitabila); “pakuuba anweba mu Nkamona, mambo Amiwa kekala nenu, ne mwi anweba, kufikatu ne kupelo ya ntanda.” Twayuka mba Anweba mwi umotu keesha, leelo, ne myaka yonse.

<sup>103</sup> Nkambo, Byambo byaambiya, bya nembwa, pano bilekai byubiwe, ku Lukumo lwa Lesa, mu kumweshá Aye kyo alamina Kyambo Kyanji. Amena. Lesa emupeshe.

<sup>104</sup> Amiwa mbena kwita mulaini wa milombelo. Naketekela Billy wajikwamba mba napana bitupa bya milombelo, kimo kufika pa aduleedi, nangwa kiji nobe byonka byo. Aye pakimo kinye kechi uji muno ne. Ke...Nambala ya kitupa kya milombelo ika...Muntu umo atale panyuma ya kyobe... Kyafwainwa kwikala—kyafwainwa kwikala nambala ne—ne kisopelo (A, B, C, D, nangwa . . .). Yoyika, A? Kijitu bulongo.

<sup>105</sup> Twayai twikale na A, nambala wanu, tuu, fiili, foolo, faivi. Tatulaitu kwimana bibye. A, nambala wanu, nambala tuu, nambala fiili, nambala foolo. Foolo, kechi Najikwiimona kwimana ne. Kitupa kya milombelo nambala foolo. Wanu, tuu, fiili. Milombelo . . . Kape kechi bakonsha kwimana ne. Inge kechi bakonsha ne, muntu umo atale pa kitupa kya bomwaikala nabo, kape uji na kitupa bino kuuba waimana ne. Bukiji bukiji pano. Apo po iji, foolo. Faivi, kitupa kyamilombelo nambala faivi. sikisi, sebeni, eiti, naini, teeni, leveni, twelufu. Tatulaitu kwiya monka mwaichilwa manambala enu. Nambala wanu, tuu, fiili, pano iyaitu kululwe lubaji. Kitupa kya milombelo nambala wanu, tuu, fiili, foolo, faivi, sikisi, sebeni, eiti, naini, teeni, leveni, tolaitu bifulo byenu. Leveni, twelufu, satiini, fotiini, fiftiini, sikisitiini, sebetiini, eitiini, naitiini, tweti, tweti-wanu, tweti-tuu, tweti-fiili, tweti-foolo, tweti-faivi. Kujipo muntu umo wakakalwa . . .

<sup>106</sup> Namona mwanamulume ukiitwala uji mu kipona kyamawilo kunyuma kooko. Inge nambala yenu yaitwa, mwaana wamulume, kabiji—kabiji inge kechi mwatambula ne...

kyawama, kwatayitu kuboko kwenu, tusakumona kuuba mba mwafika kuno. Mwamona?

<sup>107</sup> Baanga muno babula kwikala na kitupa kya milombelo bino kasa bakolwa? Twaiyai tumone maboko enu, konse konse. Ponka pano, abyo ibyo, sutulai maboko enu. Mwaketekela nyi? Mukimye kyo babena kwibabungizha pamo, mwaketekela Kikye nyi, amba Aye ujitu pamo keesha ne myaka yonse? Baji baanga? Talai babo bamingilo; bushe Kinembelo kechi kyaamba leelo, balongo, amba Aye ye Ng'anga Mukatampe awo wakonsha kumvwa bya kunekena kwetu? Abyo ibyo nyi? Baanga baketekela kyokyo, sutulai kuboko kwenu? Aye ye Ng'anga Mukatampe awo wakonsha kumvwa bya kunekena kwetu.

<sup>108</sup> Inge Baibolo waamba mba, "Aye ujitu pamo keesha ne myaka yonse," baanga baketekela kyokyo? Nanchi pano Aye wakonsha kuuba byepi leelo? Aye wafwainwa kuuba byonka byo Aubile keesha. Abyo ibyo nyi? Kwepi Koanji bufuku buno? Wayikala ku kuboko kwa kilujo kwa Bumfumu, mubiji Wanji; Mupashi Wazhila uji muno mu kishimikwa, pakuuba mba Aye ayukanyikwe.

<sup>109</sup> Talai, pano monai. Kika kyamwekele muntu umu byo a mukwachile ku kya kumvwala Kyanji kunyuma akwa, mwanamukazhi juba jimo? Aye kechi wajinga na kitupa kyamilombelo ne, twakonsha kwaamba mba, pakuuba wamukwachile ku kya kumvwala Kyanji. Kabiji byo akwachile ku kya kumvwala Kyanji, Yesu waalulukile ne kwaamba mba, "Ing'anyi Wakwata?"

<sup>110</sup> Petelo wa Mulengulwile, ne kwaamba mba, "Kika, Nkambo, akyo kechi kyaumvanyika nobe muji maana ne. Kika, muntu yense ubena kwesekesha kwimukwata Anweba. Pano kika kyo mwaambila mba, 'Ing'anyi Wakwata?'"

<sup>111</sup> Aye waambile mba, "Bino Naumvwa nobe Nakooka." Baanga bayuka kyokyo? *Bulume*, kyalumbulula mba "ngovu," yafumine mwi Aye. "Naumvwa ku kooka, muntu umu Wajikukwata na musango wakwachilo yapusanako." Kabiji Aye waalulukile ne kutajisha mujibumba posotu Aye byo ataine aja jishinda ja lwitabilo.

<sup>112</sup> Bantu bonse babikilenga maboko abo pe Aye, "Anweba Labbi, Anweba twimuketekela," kabiji ne byonse bye.

<sup>113</sup> Bino pajinga muntu umu awo kine Wikiketekejile. Kabiji wakwachile ku kya kumvwala Kyanji ne ku ketekela mba wabukwa, mambo waambile mu muchima wanji amba umvwe nekyube ikyo kisakumweka.

<sup>114</sup> Aye waalulukile ne kutajisha mu jibumba posotu byo Amutaine, kabiji Aye waambile mba...wamubujile mba lukatazho lobe lwa mashi lwaleka kabiji pokapotu watambwile lubuko. Abyo ibyo nyi? Pano, abyo ibyo byo Aubile, mukachi kajibumba ja bantu.

115 Pano, Amiwa mben a kwamba mba Aye kechi wafwa ne, Aye uji nabumi leelo pamotu nobe byo Ajingatu nekala. Kabiji Baibolo waamba mba, Yesu waambile mba, Ayemwine, “Byonka byo kyajinga mu moba a Sodoma, byo byo kikekala ne pakwiya kwa Mwaana muntu.”

116 Pano talai, nangwa kwikale kya bupe kyamusango byepi akyo Lesa kyo apana, kwafwainwa kwikala umo kookwa, ne aye, wakonsha kukumbula ku kikye. Aye waile mu muzhi, Baibolo byo byo aamba, “Kwajinga bintu byavula bingi byo Abujile kuuba mambo akubula lwitabilo lwabo.” Abyo ibyo nyi? Kintutu kimo ne leelo. Anweba mwafwainwa kumuketekela Aye. Anweba mwafwainwatu ku muketekela Aye. Ajo jojonka jishinda ja kwikyubilamo.

117 Bushe mulaini wamilombelo wanengezhiwa? Bino, muntu yense ekale wamunema nobe ba mineti teeni. Kechi Nayuka ne kana nsakupwisha kufikizha kooko, Njina pepi nobe tweti-faivi nangwa sate baimana kooko. Kabiji pano, mu mulaini wa milombelo, yense uji moomo mu mulaini wa milombelo awo wayuka mba Amiwa ne mwenyi kwi anweba, kabiji kechi Nayukapo nangwa kimo pe obewa ne, sutulai kuboko kwenu. Yense uji mu mulaini wamilombelo.

118 Pano momo mukachi ka jibumba, aba bayuka mba kechi Nayukapo nangwa kimo pe obewa ne, sutulaike kuboko kwenu. Pano, pano, kino kyo Mben a kweseka kwamba, mulunda, mwamona. Pano, kiji bino. Bonseebe ba mwingilo banji kuno ku pulatifomu. Kabiji Kilishitu wapaine yuwe mulaye. Mwamona, kyanembwa. Kyafwayijilwe kufikizhiwa kimye ka? Mu moba a kumpelo, pepitu na Kwiya kwa Nkambo. Abyo ibyo nyi? Kyafwayijilwe kufikizhiwa pa kyokyo kimye.

119 Bino, akyo kyo Kyambo kyalailwa leelo. Kechi kyeya kyakwa Luther ne; kechi kyeya kyakwa Wesley ne; nangwa kechi ke kyeya kya Kipentekosito ne. Kyapitaila kuya kwalepa mu mukwakwa pakino kimye. Bino, Luther kijitu bulongo; Methodist ijitu bulongo; Baptist ijitu bulongo; byonsetu, Pentekosito, kyawamatu. Mobaji bamisango yonse baikala muno bufuku buno. Kechi ke—kechi ke—kechi ke pamuntu pamuntu bunke ne. Pano inge . . .

120 Anweba kechi mwakonsha kubuula wa ki Methodist kiji kyonse pe Luther ne, mambo aye waketekela mu kutokeshiwa kabiji Luther ine. Mwamona?

121 Anweba kechi mwakonsha kubuula ba Pentekosito amba “kutokeshiwa kyokyoka kijiko,” aye wamona kubwezhiwa kwa bya bupe. Aye kechi wakonsha kuswa kyokyo ne. Ine, aye uji nakyakilapo pa kikye. Mwamona? Kabiji aya yo nkulo ya kipwilo ya pelako yo twajinga nayo, kabiji Baibolo waamba mba kechi kukekalapo nkulo ya bipwilo ikwabo ne.

122 Bino kukekala kubungizhiwa kwa bantu, monai, kabiji pano popo tuji. Bino, vulukai, kiyukilo kya pelako. Bushe atweba bantu tubena kupembelela awa mwaana walailwe? Sutulaiko kuboko kwenu. Bushe mwaketekela mba anweba mwi Lukunwa wa kwa Abulahama ponka pa kwikala mwi Kilishitu? Sutulaiko maboko enu. Pano, Lukunwa wakwa Abulahama, tambulai kiyukilo kyenu! Kechi kiji mu Babilona ne, kechi kiji momwa mu ntanda ya madinominesheni ne. Kijitu muno mukachi kenu, abo babula mukyokya kivundakanya. Kiketekelai!

123 Uno ke mwanamukazhi, aye ke mwenyitu mwine kwi amiwa, monkatu mu nkulo imo. Amiwa kechi nakimonapo awe mwanamukazhi mu bumi bwami ne. Inge Nakonsha kubuka awe mwanamukazhi Nakonsha kwi kyuba, umvwe wakolwa. Amiwa kechi nayukapo kintu nangwa kimo pe aye ne. Bushe mwajikumona byo akusutula maboko anji ma mineti acheche apitapo? Amiwa—Amiwa kechi na kimumonapo ne. Ke mwanamukazhitu waimana popa.

124 Leelo ba jikwiiya kuno na kuleta mulumba wa bitupa bya milombelo, be amvwangaula ne kwiapana ku bantu. Umo wajikutambula nambala wanu kuno, kabiji nambala teeni kunyuma kooko, nambala fifitiini, nanbala sebeni, nambala . . . nobe byobyo. Be amvwangaulatu, ku meso enu, pajuba pajuba. Kabiji umvwe baitwa, betwatu kufuma konse konse. Mwamona? Kabiji, pano, anweba kechi mwafwainwa kwikala ne na kitupa kya milombelo ne, ikalaitu popo ne kuketekela. Kika kyo . . .

125 Ipesa pesai anweba bene, bufuku buno, muntane awala ye tubena kwikalamo. Mwamona? Bino, kijitu pepi nobe kimye kypawa, ne akyo, mulunda. Pepitu kupwa!

126 Pano, umvwe Lesa wakwa Abulahama wasangwile Yesu Kilishitu kufuma ku bafwa, kabiji Yesu walaile kyokyo amba mu moba a kupelako biyukilo bimotu amba Abulahama . . . awa Malaika (awo wajinga Lesa mu mubiji wa bumuntu) kyo aubile kwi Abulahama, mwaana walailwe kasa akyangye kufika, Yesu waambile mba kintutu kimo kikobiwa mu buleelo.

127 Bino, twamona maatomiki ne madinominesheni, ne byonse byo, kabiji ne byalubakana byo bajimo. Twamona Billy Graham kookwa, ne Oral Roberts, ne bonseebo bantu bajikokwa; aye muluwe waki Pentekosito ne aye muluwe waki dinominesheni kookwa, twamona byonse bye kasa bibena kubiwa, kufikizha kiyukilo. Billy Graham, sendwe wa masukuulu abupopweshi, byo baketekelamo madinominesheni. Oral Roberts, sendwe wa byalubuko, byonka byo kyafwainwa Pentekositi . . .

128 Pano talai kuno, kuji kintu kikwabo kyalailwa ku Lukunwa wakwa Abulahama. Mobaji monka mukachi kabo ba madinominesheni; mujipo kintu kimo *momwa* mu madinominesheni kyafwainwa kumweka, kubungizha bantu. Tusakwikileka poso keesha bufuku.

129 Talai, kechi Namuyuka awe mwanamukazhi ne. Amiwa nsakutazha nyuma yami kwi aye. Inge aye Nkambo Lesa usakwambapo kintu kimo kuyewa mwanamukazhi, kape kya—kya panzubo, kapepo bya bumali, kapepo wakolwa; Amiwa kechi nayuka ne. Aye usakuyuka kana kya bukine nangwa ine.

130 Inge Aye usakuuba kintu kimo bufuku buno akyo kyo Aubilepo mu kyokya kimye, musakuketekela Lesa awo Yesu Kilishitu ye alaile amba ukekalako mu moba a kupelako? Baanga baketekela mba tubena kwikala nobe mu Sodoma, mu kimye ntanda yonse yaya mu musango wakina Sodoma? Baanga ba mwianweba baketekela mba kyo Nemubuula bufuku buno kya Bukine? Nanchi, baana ne Lukunwa wakwa Abulahama, ketekelai Lesa!

131 Pano, nanchi kisakufumamo mu milanguluko yenu kyo Mbena kweseka kwamba kintu kimo ku mwanamukazhi, byo mbena kumutala mu kilungi, nangwa kusenda bintu byonse byakutanga milanguluko ya bantu nangwa byonse byo musaka kuyuka. Yense wayuka pa bya kutanga milanguluko ya bantu wakonsha kwikala na milanguluko yawama kukila payoyo. Mwamona? Mwamona? Mwakimonapo muntu uyanga milanguluko ya bakwabo usapwila Mambo awama nyi? Mwakimonapo muntu wa byamupashi usapwila Mambo awama, ke obe biyukilo ne bya kukumya, keambe mba Yesu Kilishitu ujitu pamo? Ine.

132 Monai, kijitu...ke milanguluko ya bantu. Mwamona, bampofu. Mwaketekela mba bakonsha kwikala bampofu? Aye Baibolo waamba mba byo byo bakekala. Abyo ibyo nyi? “Balupata lwa kuba bibi, ba kwilundumika, ba kutemwa bya lusangajiko ne kutemwa Lesa ne, ba kubula kupwanang’ana, ba kwibabepela bakwabo, ba kubula kwilama, ba kubula kutemwa boba byawama ne, kasa banji na kipashang’anotu kya bwinalesa, bino Bulume bwa ao munema bebukana.”

133 Bushe Yesu kechi waambile mba, mu Mateyo Wazhila 24:24, amba aya mipashi ibiji mu moba akupelako bakajimbaika bonka Basalululwa, inge kyakonsheka kubiwa? Bino kechi kyakonsheka ne. Bajinga mu milanguluko yakwa Lesa ku ntendekelo, kabiji ke lubaji lwakwa Lesa.

134 Pano, Lesa wakwa Abulahama, Izaka, ne Yakoba, lekai kiyukanyikwe mba Mbena kubulang’ana bya Bukine pe Anweba. Ke Anweba, Nkambo. Mukwikapesha lekai bakalume Benu bafumyemo milanguluko yabo mu jishinda, amba Anweba mwingijishe mibiji yetu ku Lukumo Lwenu. Mu Jizhina ja Yesu, aye Mwaana wakwa Lesa. Amena.

135 Kyabupe kyo kika? Kechi ke kintu kyo mwakonsha kutolatu ne kwikichibaula kabiji ne kwikyulula ne. Ine, ine. Ke kuyuka byo wakonsha kwifumyamo obewa mwine mujishinda pa

kubamba Lesa akwingijishe. Kyabupe ke kwifumyamotu obewa mwine, ne Lesa wikingijisha.

<sup>136</sup> Aye inetu uji panyuma yami ubena kufwa inge kechi wakonsha kutambula lubuko ne. Awe inetu uji panyuma yami bafuma na ku mulombelela ku muntu mukwabo, katatakatu. Uji na kaasa. Awa kaasa uji ku jibele janji kabiji ne ku mapwapwa. Kabiji ba mulombelejiletu katataka, kabiji ubena kweseka kwikitambula ku lwitabilo amba wabukwa. Akyo ABYO BYOBYAAMBA AYE NKAMBO! Bushe akye kyakine nyi, inetu? [Aye inetu waamba mba, “Ee, kine kya bukine.”—Waku.] Inge byo byo kiji, nsokona—nsokona kuboko kobe ku jibumba. Aye Lesa wakwa Abulahama ukiji na bumi! Kijitu bulongo, yanga ketekela byo waketekela kabiji usakwikalatu bulongo. Amena.

Obewa waketekela? Mwaamba mba, “Pano nga jibumba?”

<sup>137</sup> Awe mwanamukazhi waikala papo ne aye...pa pelela mulaini, inetu wabubiji apo ponka. Byo Najikwaluluka ponkapo Najikumonapo kintu kimo, kintu ku kuboko kwanji, mashi kwenda lubilo. Aye uji na kikola kya kwenda mashi lubilo. Bushe ibyo nyi, inetu? Sutulai kuboko kobe. Inge waketekela, kikola kyakwenda mashi lubilo kisakubwela panshi. Aye Lesa wakwa Abulahama ukiji ponka pano. Aye ujitu pamo byonka byo kyajinga, Kyambo kya kwa Lesa kya mujino juba!

<sup>138</sup> Muji byepi? Anweba mwaketekela pano nyi? Ikalai na lwitabilo mwi Lesa! Kyamwekatu nobe mwanyike. Lesa wayuka muchima obe, inetu wakyanyike, kechi Nayuka ne. Mwaketekela mba Lesa wakonhsa kusolola kwi amiwa kintu kyatama nyi? Mwakonsha ku Muketekela inge Nakonsha? Kechi kyenu anweba ne, ke kya muntu ungi, ke mulongo obe. Kabiji misongo yabaya bingi, kabiji uji mu muzhi ku kabeta ka buyeke kukwe, Tulare. Kabiji uji mu kipatala, kabiji uji na kikola kya kukepa mashi mu mubiji, kabiji ba madokotala bakakalwa mba afwetu. Kechi kujipo luketekelo nangwa pachechetu ne. Abyo ibyo. Mwaketekela nyi? [Aye inetu, kujila, waamba mba, “Yesu.”—Waku.] Kijitu bulongo. Kika kyo uji nakyu mu kuboko kobe? Sendai kyokyo mu kamuteteke. Kabiji kechi mwikizhinauke ne. Ketekelai! Amena.

<sup>139</sup> Mwaketekela nyi? Amiwa kechi nakimonapo inetu mu bumi bwami ne. Pakuuba Lesa wakikalatu Lesa! Pano, mbulai muntu wakonsha kuuba kikye? Kechi kiji mu ndengelo ya muntu mu kwikyuba ne. Ke Lesa awo Yesu Kilishitu ye alaile amba ukekala kuno mu moba akapelako kabiji ukeshiniikisha Ayemwine (kumeso a Lukunwa wakwa Abulahama) nobe byonka byo kyajinga mu moba a Sodoma.

<sup>140</sup> Pano papo, Amiwa kechi na muyuka inetu ne, twibenyi umo kumukwabo, Naketekela mba ko kukumana kutanshi mu bumi bwetu. Mwaketekela mba amiwa ne kalume Wanji

nyi? [Aye inetu waamba mba, “Ee.”—Waku.] Mwaketekela mba akye ke Kyambo? [“Ee.”] Kabiji mwayuka mba inge... Akye Kyambo kikijitu kipima ne kulondalonda mwaila milanguluko ya muchima. Abyo ibyo nyi? [“Abyo ibyo.”] Akye Kyambo ke Lubuko, ne akyo, inge mwakonsha kwi Kiketekela. Mwaketekela. Obewa wamvwetwa na kivule, ne akyo, na kivule kifita. Ke kaasa. Kabiji mwaketekela mba Lesa wakonsha kumbula paji kaasa nyi? Kanji mu mila yaicheche, nanchi dokotala byoabyo aamba. Pano mwaketekela mba musakubukwa nyi? [“Amena.”] Yanga, kabiji kuzhinauka ne, kabiji Lesa usa kwimulenga kwikalatu bulongo. Amena.

<sup>141</sup> Mwaketekela, anweba bonse nyi? Byonka Aye byo alaile kuba! Ikalai na lwitabilo mwi Lesa, kuzhinauka ne.

<sup>142</sup> Twi benyi umo ku mukwabo. Amiwa kechi na kuyuka ne. Inge twibenyi, leka jibumba jiyuke kyokyo, twikwate maboko etu. Amiwa kechi na kimumonapo awe mwanamukazhi mu bumi bwami ne.

<sup>143</sup> Mwaketekela anweba koko nyi? Mwaketekela mba ke Yesu Kilishitu nyi? Kyokika? Ke Kyambo Kyanji. Umvwe abo bantu be Kikana, kechi babena kukana muntu ne, babena kukana Kyambo. Ke Kyambo kyajinga pangye, kyakakalwa kutwela jibiji mukachi.

<sup>144</sup> Pano, inetu ke mwenyi kwa amiwa. Amiwa kechi nakimumonapo kala mu bumi bwami ne. Lesa ye Lubuko. Kape kechi kya luboko ne, kyakonsha kwikala kya kintu kikwabo, pano inge Lesa usakundondolwela lukatazho lobe byo luji, usakuketekela nyi? Kintu kitanshi ubena kukeba milombelo yakwa, ke, uji na kutwi kwatama. Kutwi koobe kumo, kechi umvwinako ne. Abyo ibyo. Akyo kyakine. Kabiji uji na musango, ubena kukeba awa musango kufumapo pe obewa, ke kupepa tusanga. Pano bika munwe obe mu kutwi kobe kwawama, kijitu bulongo, kutwi kobe kwawama. Kijitu bulongo. Pano ketekela Lesa kabiji yanga kulutwe kobe, kabiji kechi... kabiji kechi ukapepa jibiji tusanga ne inge wakonsha kuketekela. Yanga, kabiji Nkambo akupeshe.

Mwamona kya mwekele. Bushe Aye kechi wakine nenyi?

<sup>145</sup> Amiwa kechi na kuyuka ne, twibenyi umo ku mukwabo. Amiwa kechi na kikumonapo ne, pakuuba Lesa wakuyuka. Inge Lesa wakonsha kumbulapo kintu kimo pe obewa, wakonsha kuketekela nyi?

<sup>146</sup> Bushe jibumba jonse jakonsha kuketekela nyi? Ng’anyi wa muyuka mwanamukazhi? Ng’anyi mu jibumba wamuyuka mwanamukazhi? Kijitu bulongo, obewa wayuka kana kyakine nyi nangwa ine. Akye kyafwainwa kwikipwisha. Akye kyafwainwa kubulang’ana bukine.

<sup>147</sup> Bino mwamona kyajikumweka mu mamineti acheche apitapo. Mwamona? Ke... Mbeni kutalatata. Mwamona? Kijitu

nobe bitu byonse byaaluka bumpofu kwi amiwa. Monai, Ke kuyuka bapashi. Monai, Ke Mupashi Wazhila. Kechi ke amiwa ne. Ke Kyambo kyalailwe mumoba aleelo. Kechi kya kimwekapo ne kufumatu mu moba a batumwa, kechi kya kyubiwapo ne. Bino ponka po kyaambiwe mba, “Kasa akyangye kwiiya Mwaana muntu. Nobe byonka byo kyajinga mumoba akwa Lota, nanchi byobyoyo kikekala pa kwiiya kwa Mwaana muntu.” Babula lwitabilo kechi be Kiketekela ne. Abo kechi baketekelwa mba bakonsha kwi Kiketekela ne. Pakuuba baitabila be Kiketekela!

<sup>148</sup> Pano, umvwe Mupashi Wazhila usakusolola kikye, baanga basakuketekela na muchima wenu yense, musakusutulako kuboko kwenu?

<sup>149</sup> Anweba muji na kyaonaika. Mwajinga na mapuso amotoka, kyselakenye longololo pa shingo yenu. Anweba muji ne na lukatazho lwa jifyo. Abyo ibyo, kechi ibyo nyi? [Aye mwanamukazhi waamba mba, “Ee, mwane.”—Waku.] Mwaketekela nyi? [“Ee, mwane.”] Anweba musakwikalatu bulongo. Jitotwe ja Nkambo.

<sup>150</sup> Anweba mwaketekela mba Lesa ubuka lukatazho lwa jifyo nyi? Nanchi yanga kabiji utambulwile ne lubuko lobe.

<sup>151</sup> Iyai, inetu. Talai kukwe. Mwaketekela mba Lesa wakonsha kubuka lukatazho lwa muchima nyi? Kijitu bulongo, yanga kwenu na kuketekela, kabiji muchima obe usakwikalatu bulongo.

<sup>152</sup> Iyai kuno. Anweba mwaketekela mba Lesa wakonsha kubuka musana wenu, ne kwimulengela kwikalatu bulongo? Yainga na kwikiketekela nanchi.

Ketekelaitu Lesa, kyokyo mwafwainwa kubatu anweba!

<sup>153</sup> Iyai, inetu. Anweba mwaketekela mba Lesa ubuka lukatazho lwa munda? Yang, kaje kajo kamulajilo, ketekelai na muchima wenu yense.

<sup>154</sup> Iyai. Anweba mwaketekela mba wakonsha kubuka kikola kya mashimba? Nanchi yainga, ketekelai, kabiji ubai. . . kabiji Lesa usa kwimukosesha.

<sup>155</sup> Kyawamatu bulongo, iyai. Anweba mwaketekela na muchima wenu yense? Anweba mwaketekela? Kikola kya mashimba, ne jikwabo. Mwaketekela mba Lesa usa kwimukosesha? Yainga, kiketekelai, aambai mba, “Nemusachila Anweba, Nkambo.”

Baanga baketekela kooko? Mwaketekela nyi?

<sup>156</sup> Awe inetu waikala papo wavwala ndeshi ichila, ubena kusutula kuboko ponkapo, wakatazhiwa na kikola kyakwenda mashi lubilo. Anweba mwaketekela mba Lesa usa kwimukosesha nyi? Mwaketekela nyi? Kijitu bulongo. Bikai kuboko kwenu pa yewa mwanamukazhi walamakana ne anweba



popo, kabiji mubuulai mba jiwi janji jisakwikalatu bulongo. Amena.

Abyo byobyo kiji. Amena. Mwaketekela nyi? Ikalai na lwitabilo!

<sup>157</sup> Apo paji mwanamulume waikala papo, ubena kunonkola mashi. Mwaketekela nyi, mwane, anweba mwaikala ponkapo? Ee, mubena kunonkola mashi. Anweba mwaketekela mba kisakubukwa nyi?

<sup>158</sup> Ao inetu waikala pepi ne anweba nanji unonkola mashi, kabiji uji na lukatazho lwa musana. Anweba mwaketekela mba Lesa usakwimubuka nyi? Mwaketekela nyi? Sutulai kuboko kwenu ne kwikitabizha. Ketekelai.

<sup>159</sup> Awe inetu waikala pepi ne obewa uji nalukatazho lwa mauulu ne kapole. Mwaketekela nyi mba abyo ibyo, inetu? Anweba mwaketekela mba musakubukwa nyi? Kyawama, sutulai kuboko kwenu, ne kwaamba mba, “Ne kitabizha.”

<sup>160</sup> Kijitu bulongo, inetu walondelapo uji na kikola kyakusambuzhanya. Anweba mwaketekela mba Lesa wakonsha kubuka kikola kya kusambuzhanya, inetu wakyanyike wawwala magalasi? Sutulai kuboko kwenu, ne kwaamba mba, “Ne kitabizha.” Kijitu bulongo, kiketekelai.

<sup>161</sup> Ao inetu walondelapo uji na lukatazho lwa jifyo. Mwaketekela mba Lesa usakubuka lukatazho lwa jifyo, inetu? Kijitu bulongo, sutulai kuboko kwenu, kitabizhai.

<sup>162</sup> Ao songwakazhi walondelapo kwi aye uji na kibovu. Anweba mwaketekela mba Lesa usakubuka kyokyo kibovu nyi? Sutulai kuboko kwenu, kitabizhai.

<sup>163</sup> Baanga baketekela na muchima wabo yense? Nanchi imanai ne kwikitabizha. Imanai mu Kyeenyi kya Lesa wa Abulahama, Izaka, ne wakwa Yakoba.

<sup>164</sup> Mu Jizhina ja Nkambo Yesu Kilishitu aye Mupashi Wazhila apone ponka pano mu kishimikwa kabiji ne kubuka muntu yense uji mu Kyeenyi kya Bulesa!



*LESA WIILUMBULULA AYE MWINE* KDE64-0205

(God Is His Own Interpreter)

Ino Mbila na Mulongo William Marrion Branham, yalupwilwe patanshi mu Kizungu pa Kisatu mabaanga, Kubomukata 5, 1964, pa Kern County Fairgrounds ku Bakersfield, California, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)